

武陵縣志卷三

沿革

武陵在禹貢荊州之域春秋戰國屬楚秦屬黔中郡漢初屬武陵郡縣曰臨沅曰索索郡治焉後漢索更漢壽荊州刺史治焉而郡移治臨沅又析置沅南縣三國先屬蜀後屬吳晉仍漢舊宋改郢州齊因之梁置武州後廢陳復置武州後改曰沅州而郡縣名皆如故隋乃廢郡改爲朗州并臨沅沅南漢壽三縣爲武陵縣朗州治焉大業初復置武陵郡唐武德四年復爲朗州開元中屬江南西道天寶初仍曰武陵郡改屬山南東道乾元初復爲朗州昭宗時改爲武貞軍梁爲永順軍尋爲武順軍後唐改爲武平軍周升爲大都督府皆治武陵宋乾德中降團練使屬荆湖北路大中祥符五年改朗州爲鼎州政和七年升鼎州爲常德軍置節度使紹興元年置荆湖北路安撫使亦皆治武陵乾道元年升軍爲府元至元十二年置常德安撫司十四年改爲總管府尋爲常德路明初復爲府今如之皆治武陵考其始末沿革在隋以前武陵爲郡名自隋以後武陵爲縣名志縣原不及郡然縣爲州郡路府治所則州郡路府之事皆不得略云